

Monday, November 10, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

TOURIST IN MIZORAM

Tourism department chuan Mizorama tourist service provider-te hnen atanga khualzin awm zat an chhinchhiah danin kumin August leh September thla chung khan Mizoramah khualzin (tourist) 1,27,458 an awm.

Tourism department hotute hnen atanga Akashvani News Aizawl thudawn danin, August leh September thla chung Mizorama khualzin rawn lutte hi ram dang mi, foreigner 2,208 leh India khua leh tui mi 1,25,250 an ni a; Aizawl district-in khualzin dawng tam berin mi 75,461 a dawng a ni.

Khualzinte hi hotel leh a kaihnawih khualzinte thlenna hmun te, tourist-te hmun tlawh thin te leh Mizoram luh leh chhuahna hmun atangin chhinchhiah an ni a; kumin September ni 13 atanga Sairanga rel a lo luh hnuah Tourism department chuan Sairang rel station hi entry point atan hmangin domestic tourist rawn lut 2610 a chhinchhiah tawh bawk.

Tourism department-in heng hmun hrang hrang atanga khualzin rawn lut zat a lakkhawm tawh chin hi September thla thleng niin, thla hmasa October thlaa tourist rawn lut zat data hi lakkhawm mek a ni.

Aizawl district chu August thla leh September thla chung khualzinte luh tam berna a ni a, Kolasib district-in dawtin, Mamit, Saitual, Serchhip, Lawngtlai, Champhai leh Lunglei district-te pawh khualzin 1000 chuang awmna an ni bawk.



PM-POSHAN

Kum 2025-26 atan Mizorama sawrkar primary school leh middle school zirlai 1,29,285 hnenah chaw chhun, midday meal (PM-POSHAN) sem a ni a; sawrkar kum kal mekah April - June thla chung atan eisiamtu (cook-cum-helper)-te hlauh tur pek tawh niin, sikulte hnenah April-May thla chung eisiamna hmanrua (material component) man pek a ni tawh.

School Education department hnuai PM-POSHAN hotute hnen atanga Akashvani News Aizawl thudawn danin, sawrkar kum kal mekah hian Mizoram sawrkar hnuai sikul 2,507-a zirlai 1,29,285 hnenah chaw chhun sem a ni a, Pre-Primary School zirlai 22,960, Primary School zirlai 70,017 leh Middle School zirlai 36,308 an ni. Central-in a ruahman ang chuan chaw chhunah hian Primary School zirlai naupang pakhat tan ni khatah Rs 6 point 11 leh Middle School zirlai naupang pakhat tan Rs 8 point 35 zel dah a ni a, an chawmeh turte hi Dietitian-te'n an ruahman thin a ni.

Sawrkar laipui chuan eisiamtute hlawh tur first instalment a rawn pek tawh thu PM-POSHAN hotute chuan an sawi a, first instalment hian April - June thla hlawh pek an ni. Sawrkar laipui hian Mizoram sawrkar hnenah second instalment tur a rawn pe tawh a, tunah hian state sawrkar kutah la awmin, state sawrkarin a pek chhuah veleh eisiamtute hlawh hi pek chhunzawm theih a nih dawn thu an sawi.

Buhfai leina, phurhna leh a kaihnawih thil dang (management, monitoring & evaluation) chu central-in za-a za (100%) a rawn tum a, chawhmeh man leh cook-cum-helper hlawhte chu central leh state sawrkarin an intum sem thung tih an sawi bawk.



JSJB

Vawiin khan Lunglei District Water & Sanitation Mission (DWSM) chu an Chairman, District Bawrhsap Pi Navneet Mann hovin an thu khawm a. Vantlang thawh hona kal tlanga tui khawl leh humhalh tura hma lakna, "Jal Sanchay Jan Bhagidari" (JSJB) 2.0 kalpui dan tur an sawi ho.

Chairman chuan JSJB 2.0 chu Ministry of Jal Shakti hnuaiia "Jal Shakti Abhiyan: Catch the Rain" Campaign hma lakna peng khat a nih thu sawiin, tui hna humhalh, tui renchem leh ruahtui khawl khawm chu sawrkar kut chauh ni lovin, khua leh tui zawng zawng hma lakna tur leh thawh hona tur a nih thu a sawi a. Lunglei District-a mi tinin tui in tur leh hman tur hnianghnar an hmuh theih nan leh JSA: CTR leh JSJB 2.0 hma laknate a hlawhtlin theih nan sawrkar department, khawtlang hruaitu, tlawmngai pawl leh mipui vantlang te chu mahni zawnah tan la theuh turin a chah a ni.

JSJB 2.0 hi tuizem leh tuikhuah siam leh enkawl kal tlanga tui awm sa humhalh leh renchemna tur leh lei hnuaiia tui hna tipung tura hma lakna tur a ni a. Mipui tui mamawhna phuhru tur leh tui hna tipung tura sawrkar, sumdawng, tlawmngai pawl, khawtlang thuneitu leh mipuite thawh honaa hma lak chu he campaign hian a tum a ni.

JSJB 2.0 hnuaiia hian ruahtui khawlina tur tuizem siam te, tui luang riral tur venna khur leh tuikhuah siam te, lei hnuaiia tui hna khawl leh tipung tura hma lakna hrang hrang te kalpui a ni dawn a. Heti lam hawia hma lakna hrang hrangte chu June 2025 leh May 2026 inkar chhungin JSJB portal-ah theh luh tur niin, category hrang hranga hma la tha state leh district te tan lawmman siam a ni ang.

Lunglei District-a JSJB 2.0 kalpui turah hian department hrang hrang hnuaiia tuizem, tuikhuah, khur leh tui khawlina siam tawh leh he lam hawia hma laknate khawn khawmin, Lunglei District dinhmun zir chian hmasak ni se, chumi atang chuan hma lak zui dan tur ruahman leh ni se, tih a ni.



PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn.

Akashvani Aizawl Regional News Unit chuan PTC tur hi Aizawl, Hnahthial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, 2025 thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani dawn a, AIR News Aizawl Facebook page ah download theihin a awm bawk ang.

Hrechiang duh tan AIR News Aizawl Social media page ah leh phone number 8131823773 ah zawhfiah theih a ni.



GST REFORMS

Prime Minister Narendra Modi a'n September ni 22 a GST dan thar a tih chhuah chuan ramchhung mipui te ah hlawk na a thlen mek zel a, vawiin chuan Stationery a nghawng a neih dan kan tarlang dawn a ni.

GST rate dan chuan ramchhung mipui te ah hlawkna a thlenna a thlen zel a, stationery hrang hrang ah chhiah lak a ti hniam a, pencil, eraser leh lehkhabu hrang hrang hrang ah te a hma a chhiah lak zaa 12 ni thin chu chhiah lak tih tawp a ni tawh a, heng avang hian zirlai leh nu leh pa ten he dan thar hi an hlawkpui hle a, sumdawng te tan pawh inhralh a awl phah hle a ni.

